

Date – 22/11/2025

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Hachhek Bial Kuhva Chingtu Pawl (HBKCP) chuan an kuhva thar te hralh mekin tunah hian cheng nuai 5000 chuang man an hralh tawh.
2. Member 25 awmna Lai Autonomous District Council inthlan lo awm tur atan a inbuatsaihna ngawrh taka kalpui chhoh mek a ni.
3. Prime Minister Narendra Modia chuan khawvel hmasawna kal mek dan chu ngunthluk zawka ngaihtuah a tul thu a sawi.
4. Ramchhunga industry liana hotute chaun sawrkarin Labour Code thar hman a rel chu lawmawm an tih thu an sawi

<><><>

HACHHEK

Hachhek Bial Kuhva Chingtu Pawl (HBKCP) chuan an kuhva thar te hralh mekin tunah hian cheng nuai 5000 chuang man an hralh tawh.

HBKCP General Secretary Pu Victor MS Dawngliana chuan Akashvani zawhna chhangin kumina an kuhva hralh tawh zat chu a chiah chiah an la sawi thei lo a. Tuna an hriat theih chinah cheng nuai sang 4 za 4 chuang man an hralh tawh thu sawiin khaw 7 la in report lo atanga lut tawha ngaih cheng nuai 600 chuang nena chhut chuan cheng nuai sang 5 chuang hret a nih dawn thu a sawi a, fur kuhva manrawn belhchhah tur a la awm nual bawk thu a sawi a ni.

Pu Victor MS Dawngliana chuan kuhva hi nakum April thla thleng hralh an tum thu sawiin an kuhva leitu chu Assam lam atanga sumdawngte an nih tlangpui thu a sawi a. A tam zawk chu an ni hian leiin anni bakah hian Tripura atang pawhin anrawn lei nual thu an sawi a. Kuhva hralh kawngah an pawl chuan kuhva par hman atangin ruahmanna fel tak siamin a hralhna tur lam pawh fimkhur taka an ruahman lawkin Mizoram leh Assam sorkar pawh vawi duai lo an dawr tawh thu a sawi a. Hetihrial hian harsatna hrang hrang pawh an tawh thin thu leh kuhva leitu rinawm lo pawh an tawn ve zeuh zeuh thu an sawi a. Pawl anga theihtawpa hman lak zel thu an sawi a ni.

Pu Victor MS Dawngliana chuan an pawl hnuaia khaw hrang hrangte hlawhtlinnaah an lawm thu leh a hralh tha zual khaw 10 thlanchhuah an tum thu a

sawi a. Kuhva hi an huamchhungah kum 1950 chho atanga an chin tan thu leh kuhva man chu kum 1987 atanga pangngai taka an tel chhoh tan thu an sawi a ni.

<><><>

DRUG HAUL

Nimin leh nimin piah zan khan Mizoram Police-te'n hmun hnihah ruihhlo cheng vaibelchhe 41 leh nuai 64 chuang hu an man.

IGP Pu H. Ramthlengliana'n a sawi danin nimin khan Saitual district Police te chuan heroin Kg 1 leh gram 12 (Hawng 89) an man a. Manipur atanga Aizawl lam pan, Wagon R car atanga an heroin man hi chang vaibelchhe 2 leh nuai 25 chuang hu a chhut a ni a. He car khalhtu Manipur a cheng Jamminlal Touthang (28) lakah Saitual Police Station-ah Narcotic Drugs & Psychotropic Substances Act, 1985 section 21(c)/25/29 hmanga thubuai ziahluh nghal a ni.

Hei bakah hian Ningani zan dar 10:30 vel khan Mizoram Police hnuai CID (Special Branch) hnathawkte chuan Methamphetamine, Kg 49 leh gram 244 a rit, cheng vaibelchhe 39 leh nuai 39 hu chu lirthei lian 12-wheeler TATA truck atangin, Zemabawk Tawngtai Mual, Berawlu, Aizawl bulah an man. Special Narcotics Police Station-ah Narcotic Drugs & Psychotropic Substances Act, 1985 section 22(c) 25, leh 27 hmangin thubuai ziahluh nghal a ni a. He ruihhlo tawlh chungchanga inhnawnawih a puh mi pahnih - Atabur Rahman Mazumder (45) leh Abdur Rahman Chowdhury (29), Hailakandi, Assam nia inchhal ve ve man nghal an ni baw. Ngawrh taka a kaihnawih awmte chhui zui mek a ni.

<><><>

LADC POLL

Member 25 awmna Lai Autonomous District Council (LADC) inthlan lo awm tur atan a inbuatsaihna kal zelah vawiin khan Dispatch and Receiving Team-te pualin DRDO Conference Hall-ah Training buatsaih a ni a, District Election Officer (DEO) Pu Donny Lalruatsanga'n a hmanpui.

Pu Donny Lalruatsanga chuan inthlanna fel fai leh thianghlim nei turin mawhphurhna hrang hrang nei ten theihtawp chhuah a tul hle a ti a. A bik takin Official-te'n tihsual nei lo tura fimkhur a pawimawh hle a ni, a ti. Dispatch and Receiving Team-te an pawimawhin, mawhphurhna lian tak an nei tiin, tha taka an hna hlen turin a chah a. DEO chuan tihsual awm lo tura tha taka training nei tur a chahin, duhsakna a hlan nghal baw.

Vawiin training-ah hian Dispatch and Receiving Team-te mawhphurhna hrang hrang, tih tur leh tih loh tur, hriat tur pawimawh leh tul dangte inzirtirna hun hman a ni a. Pu Gilbert Lalhlimpuia, (Master Trainer) leh Pu Collin Hlychho (Election Officer) - te chuan training- hi an pe a ni.

<><><>

FIRE GUTS FURNITURE WORKSHOP AT KOLASIB

Tukin dar 3 vel khan Kolasib Rengtekawna Pu Johnson Lalhmangaiha Furniture Workshop chu bungrua engmah chuh hman lohin a kang ral vek a, cheng nuai 14 dawn man bungrua a kangral.

Kangmei a chhuak tih an hriatin chhungkhat laina hnai leh vengchhunga mi tlawmngai te chuan kangmei chhuahna hmun hi a theih angin an senghawi nghal a. Kolasib-a Akashnvani palai in thu a dawn danin kangmei chhuah chhan hi hriat a ni lo a, a neitute chuan a kan chhan hi rin dan pawh siam thiam a harsat thu an hrih a ni. Rengtekawn VCP chuan kar tharah Furniture Workshop kan chungchang hi Bawrsap hnenah ziaka thlen an tum thu an sawi a ni.



RELIEF FOR REFUGEES

Australia a Queensland khawpui Brisbane ah pawl hrang pathum, Humanitarian Assistant & Disaster Relief Institute (HADRI), Australian Chin Community Council (ACCC), leh MZP-te'n Mizorama raltlan awm mekte chhawmdawl tura thawhhona tur thuthlung an ziak.

He thawhhona thuthlung siamna inkhawmah hian Rajya Sabha MP Pu K.Vanlalvena chu khuallian niin Queensland Australia Senator Pu Paul Scarr chu khual zahawm a ni. He thawhhona tur thuthlung hi kum thum chung atan a ni a. HADRI CEO Pu Mitchell King te, HADRI Managing Director leh Australia Chin Community aiawh ni bawk Pu Lawmthanga Brisbane leh MZP General Hqrs General Secretary Pu Lalhmingsanga ten hming an ziah hnan a ni.

Queensland Australia a awm Mizo hnam peng pakhat Matu hnam te'n kar kalta Inrinni a Matu Pawlkut an hmanna-ah Pu K.Vanlalvena hi khuallian niin Australian ram hruaitu pali Pu Cameron Dick Dy Leader of Opposition Labour Party MP te, Logan city Mayor Pu John Raven te, Australian tualchhuak hnam hruaitu Pi Heather Castledine te leh LNP party Senator Pu Paul Scarr te chu khual zahawm an ni bawk. African Australian pawl te, Australia tualchhuak hnam pawl te leh Brisbane Councillor pathum ten he Pawl Kut hi an hman pui bawk a ni.

Australia Matu hnam hruaitu te chuan Matu hnam peng hrang hrang 15 te chu Mizo Tribal list a an tel ve theihna tura hma lak sak turin Pu K. Vanlalvena hnenah hian tawngkam leh ziaikin ngenna an lo thlen bawk a ni.

A tuk zanah Australian Chin Community Council kaihhrainain Chin hnam peng hrang hrangte Brisbane khawpuia an inkhawmpuia hian Rajya Sabha MP chu khuallian niin MZP General Secretary Lalhmingsanga chu khual zahawm a ni bawk.

Pu K.Vanlalvena chuan khawvel khawi ramah pawh awm i la khua leh tui tha nih a pawimawh a. Ram hrang hranga cheng Zofate hian inpumkhatna an neih a tul a. Mahni hnam bil chauh dinchhuah tumna hi paih boin hnam pum damkhawchhuahna tur hi lungrual taka zawn tlan a tul a ni a ti. Mahni hnam tawng theuh te humhalh chung siin tawng intawm atan Mizo tawng thiam vek a tul thu a sawi bawk.

Insuihkhawm a tul thu te sawi thin mah ila inpumkhatna a awm loh chuan insuihkhawm hian awmzia a nei lo a ti a. Mahni unau indona hian rah tha a chhuah ngai loh thu a sawi bawk a. Zofate dinchhuahna tur chu Pathian thu awihna-ah chauh hi a nih thu leh ralthuam hian eng hnam bil mah a dinchhuah tir dawn loh thu te sawiin Pathianin a pek mahni ram tlanbo sana ram changkang zawka pem intih hmuh zel chu tha lo a tih thu a sawi bawk a. Mahni ram chhunga harsatna tawk mek ten pem chhuah san zel an châk lohna turin ram danga awm tawh ten theih tawp

chhuaha an tanpui chu an mawhphurhna a nih thu Pu Vanlalvena chuan a sawi bawk.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



PM

Prime Minister Narendra Modia chuan khawvel hmasawna kal mek dan chu ngunthluk zawka ngaihtuah a tul thu a sawi. Vawiina G20 Leaders' Summit Johannesburg, South Africa-a neihah he thu hi sawiin Pu Modia chuan G20 in khawvel sum leh pai chevel leh hmasawna a kaihhruai viau lain tuna kalphung awm mek chuan mipui tam zawk a hlamchhiah a ti a. Hmanrua leh sum leh pai, leilung hausakna te nasa taka sawk niin Africa ramten harsatna namenlo an tawrh phah a ti a. New Delhi-a Summit neih tuma thurel te bawhzui chhoh zel anih thua sawi bawk a ni.

Puan tawh angina Prime Minister Narendra Modia hian ni thum awh G20 Leaders Summit hmang turin nizan khan South Africa Khawpui Johannesburg a thleng. Air Force Base Waterkloof ah ropui taka lo hmuah a ni a.

Pu Modia chaun khawvel ram hruaitute nen thil pawimawh tak tak sawihoa hun tha tak hman a beisei thu social media lamah a tarlang a. Prime Minister Modia hian SUMmit a a tel karlahah hian ram hruaitu hrang hrangte a kawm dawn bawk a ni.



LABOUR CODE

Ramchhunga industry liana hotute chaun sawrkarin Labour Code thar hman a rel chu lawmawm an tih thu an sawi a. Ramin a mamawh hun takah he code hi hman a ni dawn tih sawiin tunlai eibar zawna kawngah thil pawimawh tak a nih thu an sawi bawk a ni. He code thr hian hna thar siam kawngah leh social security lamah te zau zawkin a tuam dawn tih sawiin awlsamna a theln dawn an ti a. National Front of Indian Trade Unions (NFITU) President Dr. Deepak Jaiswal chuan unorganised sector ah hnahtawk vaibelchhe 50 chuang an awm thu sawiin heng mite tan hian tunah chuan minimum wages pawh a takin kalpui theih a ni tawh ang a ti.

Puan tawh angina sawrkar laipui chuan nimin khan inhlawhfate tana dan thar labour code chu hman turin a puang a. He dan thar hian kum tam tak lo hman tawh labour law hlui chu awlsam leh huapzo zawkin a rawn siam dawn a ni. Sawrkarin labour code thar hman tura a tihte hi Code on Wages, 2019, Industrial Relations Code, 2020, Code on Social Security, 2020 leh Occupational Safety, Health and Working Conditions Code, 2020 te an ni a. Union Labour and Employment Ministry chuan kum 10 kalta chung khan social security huamchin a zau telh telh tih sawiin

kum 2015-ah hnathawk thei a huamchin hi zaa 19 anih laiin 2025 ah chuan zaa 64 a huam tawh a ti a. Tuna code thar pali hman nih hnu hian hmasawwna awm belh leh tura beisei niin social security hrang hrang an neih belh dawn bakah state leh sector hrang hrangah hlawkna zau zawk a thlen dawn a ni a ti.

Union Labour and Employment Minister Dr.Mansukh Mandaviya chuan heng insiamthatnate hi thil naran mai mai anih loh thu leh sawrkarin ramchhunga hnathawktute dikna chanvo a pekna tur anih thu a sawi.

Prime Minister Narendra Modia chuan Labour code thar chu ramchhunga hnathawkte tan hma hun ngaihtuaha an hlawkna thlen tur a ni a ti. Social Media lamah he thu hi tarlangin Pu Modia chuan heng labour code thar hmang hian ram eibar zawwna pawh a chak lehzual dawn a ni a ti.

<><><>